

17/03/2001

Chong Kah Kiat KM baru Sabah (HL)

Kadir Dikoh; Wan Hazmir Bakar

KUALA LUMPUR, Jumaat - Presiden Parti Liberal Demokratik (LDP), Datuk Chong Kah Kiat, hari ini diumumkan sebagai ketua menteri baru Sabah, mengikut sistem penggiliran jawatan itu.

Chong, 53, yang juga Menteri Pembangunan Pelancongan, Alam Sekitar, Sains dan Teknologi Sabah, menggantikan Datuk Osu Sukam, yang tempoh dua tahunnya berakhir semalam.

Datuk Seri Dr Mahathir Mohamad, ketika mengumumkan pelantikan itu selepas mempengerusikan mesyuarat Dewan Tertinggi Barisan Nasional (BN) di sini, bagaimanapun tidak menyatakan bila Chong akan mengangkat sumpah jawatan dan memulakan tugasnya.

Beliau yang juga Pengerusi BN berkata, perubahan kecil akan dibuat pada sistem penggiliran itu dengan Umno akan menyandang jawatan ketua menteri bagi tempoh dua penggal kerana ia adalah rakan gabungan terbesar dalam BN negeri.

"Kita telah pinda sedikit. Kita kekalkan penggiliran, tetapi kerana Umno merupakan parti terbesar dalam Kerajaan Sabah, kita akan memberi dua kali kepada Umno berbanding sekali kepada parti Bumiputera bukan Islam dan Cina.

"Ini akan dimulakan apabila kitaran penuh sistem penggiliran itu disempurnakan," katanya.

Sistem penggiliran yang diperkenalkan pada 1994 itu bertujuan menyediakan peluang kepada pemimpin tiga kumpulan etnik utama di Sabah - Bumiputera Islam, Bumiputera bukan Islam dan Cina - untuk berkhidmat sebagai ketua menteri, masing-masing bagi tempoh dua tahun.

Bagaimanapun, sesetengah pihak mahukan sistem itu dihapuskan, manakala sebahagian lagi mahu ia dikekalkan.

Ketua menteri pertama di bawah sistem itu ialah Tun Sakaran Dandai dari Umno. Sakaran memberi laluan kepada Datuk Salleh Said Keruak, juga dari Umno, apabila beliau dilantik sebagai Yang di-Pertuan Negeri Sabah.

Datuk Yong Teck Lee, dari Parti Maju Sabah (SAPP) kemudian menggantikan Salleh bagi mengisi penggiliran untuk kaum Cina. Pengganti Yong, Tan Sri Bernard Dompok, dari Pertubuhan Pasok Momomugun Kadazandusun Bersatu (Upko) bagaimanapun memegang jawatan itu separuh penggal apabila beliau tewas pada pilihan raya negeri 1999, lalu digantikan oleh Osu.

Dr Mahathir yang mengadakan sidang akhbar selama kira-kira lima minit saja kerana hampir waktu solat Jumaat, tidak membuat penjelasan lanjut sama ada Umno secara automatik menyandang jawatan Ketua Menteri selepas Chong nanti.

Sebelum mesyuarat itu, beliau menemui Badan Perhubungan Umno Sabah diketuai Osu di Tingkat 39, Pusat Dagangan Dunia Putra selama kira-kira tiga, mulai jam 8 pagi.

Ini diikuti pertemuan dengan pemimpin kanan lima parti komponen BN yang berpangkalan di Sabah iaitu Umno, LDP, Parti Maju Sabah (SAPP), Parti Bersatu Rakyat Sabah (PBRS), Upko dan Parti Keadilan Rakyat Bersatu (Akar), di tingkat 38 iaitu Ibu Pejabat BN.

Perdana Menteri berkata, semua parti komponen BN Sabah menerima formula itu dan selepas ini, mereka akan membuat penjelasan kepada penyokong masing-masing.

"Saya jumpa juga dengan Perhubungan Umno (Sabah), mereka terima. Saya jumpa dengan BN Sabah, mereka terima dan (Dewan Tertinggi) BN juga telah mendengar penjelasan ini dan tidak ada bantahan apa-apa," katanya.

Sementara itu, Chong, ketika ditemui pemberita selepas itu berkata, beliau akan menemui Perdana Menteri secepat mungkin bagi memperhalusi perkara itu, termasuk membuat perubahan kecil kepada Kabinet Sabah.

Sambil mengesahkan beliau akan menyandang jawatan itu selama dua tahun, Chong yang juga Ahli Dewan Undangan Negeri (Adun) Kudat, melahirkan harapan wakil Umno akan mengambil alih tempatnya apabila tempohnya berakhir nanti iaitu sekitar Mac 2003.

"Selepas tempoh ini, kita berharap Umno akan ambil alih sekali lagi. Kemudian kita akan kembali kepada rakyat bagi mendapat mandat baru... ketika itu nanti pilihan raya negeri sudah hampir," kata Chong.

Yong pula, ketika diminta menjelaskan bagaimana sistem baru itu akan dilaksanakan berkata, mengikut pemahamannya, penggiliran itu akan digilirkan antara Bumiputera Islam diikuti pemimpin Cina dan kembali kepada Bumiputera Islam sebelum diambil alih pemimpin Bumiputera bukan Islam.

"Umno akan memegang jawatan ketua menteri itu secara bergilir. Sebagai contoh, Umno akan memegang jawatan Ketua Menteri untuk tempoh dua tahun diikuti parti komponen lain untuk tempoh dua tahun lagi.

"Jawatan itu akan kembali disandang oleh Umno untuk tempoh dua tahun lagi sebelum sebuah parti komponen lain pula mengambil alih," katanya.

Osu pula berkata, hasil perbincangan pemimpin BN Sabah dengan Perdana Menteri mengenai perkara itu memberikan hasil positif.

(END)